

CONVENIO DE COLABORACIÓN ENTRE A CONSELLERÍA DE VIVENDA E PLANIFICACIÓN DE INFRAESTRUTURAS E O CONCELLO DE SILLEDA PARA O FINANCIAMENTO DO PROXECTO DE MELLORA DA MOBILIDADE PEONIL NA AVENIDA DO PARQUE

Santiago de Compostela, 29 de xullo de 2025

REUNIDAS

Por unha banda, María Martínez Allegue, en nome e representación da Consellería de Vivenda e Planificación de Infraestruturas, actuando no exercicio do seu cargo, en virtude do Decreto 44/2024, do 14 de abril (DOG núm. 73 do 14 de abril) e en función das atribucións que lle confire o artigo 34.10 da Lei 1/1983, do 22 de febreiro, reguladora da Xunta e da súa presidencia.

Doutra parte, Paula Fernández Pena, alcaldesa-presidenta do Concello de Silleda, no exercicio das atribucións conferidas no artigo 21 da Lei 7/1985, do 2 de abril, reguladora das bases do réxime local.

Ambas as partes recoñécense mutuamente, na calidade na que interveñen, capacidade legal suficiente para o outorgamento deste convenio e para o efecto,

EXPOÑEN

I. O Concello de Silleda presentou con data do 7 de maio de 2025 un escrito solicitando a colaboración da Consellería de Vivenda e Planificación de Infraestruturas para acometer o proxecto de Mellora da mobilidade peonil na Avenida do Parque.

II. Por Resolución do 7 de marzo de 2025 do Pleno da Deputación de Pontevedra en sesión extraordinaria, o concello de Silleda resultou beneficiario dunha das axudas, convocadas en réxime de concorrencia competitiva para concellos con poboación inferior a 50.000 habitantes, do Plan Provincia Extraordinaria-Plan Extra para a execución do citado proxecto. A axuda concedida pola





Deputación de Pontevedra por importe de 597.698,38 €, equivalente ao 80% do investimento previsto no proxecto (747.122,98 €), polo que o concello precisa a colaboración da consellería para financiar o 20% restante (149.424,60 €).

III. Como pon de manifesto no seu escrito, o proxecto enmárcase dentro das políticas municipais de transformación urbana sostible e accesible, aliñándose co Plan de Mobilidade Urbana Sostible (PMUS) de Silleda, co Plan de Acción para a Axenda 2030 e co programa Cinto Verde, unha estratexia municipal que busca conectar todo o casco urbano a través de rúas humanizadas, accesibles e sostibles.

A Avenida do Parque é unha das principais arterias do casco urbano de Silleda e vertebrada a mobilidade entre espazos clave do municipio, como a área comercial e hostaleira do centro urbano, xeradora de actividade económica e social, e diversas zonas residenciais e equipamentos públicos fundamentais, incluíndo o parque central, a igrexa parroquial e diferentes espazos culturais. Non obstante, esta avenida presenta deficiencias en termos de accesibilidade, seguridade viaria e adecuación dos servizos públicos.

O espazo público preséntase como catalizador para a rexeneración urbana: áreas verdes, rúas, parques, equipamentos e instalacións públicas teñen unha gran capacidade de transformación.

Con esta actuación o concello busca unha transformación integral da contorna, coa modernización das infraestruturas, a creación de novos espazos públicos accesibles e a mellora da eficiencia dos servizos urbanos.

IV. O proxecto presentado polo concello integra unha serie de intervencións coas seguintes finalidades:

- Humanización e mellora da accesibilidade, garantindo un espazo máis seguro para a veciñanza.
- Modernización de infraestruturas subterráneas, incluíndo o soterramento do cableado eléctrico e de telecomunicacións, a renovación da rede de iluminación pública con luminarias LED de baixo consumo e a mellora das infraestruturas hidráulicas.
- Mellora do servizo público de taxis, reubicando a parada nunha zona máis funcional, accesible

e segura para as persoas usuarias, dotándoa ademais cunha marquesiña.

- Dinamización económica e social, coa creación dunha zona verde, a revalorización do espazo público e a renovación da pavimentación con pedra natural.
- Ampliación dos servizos culturais, coa apertura da igrexa parroquial cara á Rúa Santa Olaia, xerando un espazo aberto con escalinatas tipo auditorio para eventos culturais ao aire libre.

Trátase dunha proposta que integra patrimonio, funcionalidade e sostibilidade para proxectar Silleda cara a un futuro urbano inclusivo e resiliente. Este esforzo representa unha oportunidade para revivir a cidade, establecendo unha folla de roteiro claro para o seu desenvolvemento estratéxico e a súa revitalización urbana.

Polo exposto, estímase que coa execución do proxecto presentado polo concello se acada un impacto favorable dentro do término municipal.

V. Acredítase deste xeito que se trata dunha circunstancia singular e sobrevida, que xustifica a tramitación deste convenio, posto que forma parte da estratexia municipal para consolidar Silleda como unha vila moderna, cohesionada e sostible, garantindo un urbanismo integrador e de calidade para a veciñanza e visitantes.

VI. A finalidade da colaboración constitúe, deste xeito, unha razón de interese público que lle confire un carácter excepcional á axuda, obxecto do convenio. En consecuencia, consonte co artigo 26.2º da Lei 9/2007, do 13 de xuño, de subvencións de Galicia, faise constar que neste convenio non son de aplicación os principios de publicidade e concorrência pública. Isto xustifica, polo seu carácter de excepcionalidade, o procedemento de concesión directa por serlle de aplicación o establecido no artigo 19.4 c) da Lei 9/2007, do 13 de xuño, de subvencións de Galicia e no 36.c) do Decreto 11/2009, do 8 de xaneiro, polo que se aproba o regulamento da citada Lei de subvencións de Galicia.

VII. A Consellería de Vivenda e Planificación de Infraestruturas é o departamento da Xunta de Galicia ao cal lle corresponden as competencias e funcións en materia de vivenda, urbanismo e planificación de infraestruturas. Tamén lle corresponden as funcións en materia de ordenación do territorio, excepto as relacionadas coa ordenación do litoral, e, en concreto, as previstas no artigo 11.4 da Lei 4/2023, do 6 de xullo, de ordenación e xestión integrada do litoral de Galicia, que serán



exercidas pola consellería competente en materia de medio ambiente.

Dentro da consellería correspóndelle á Dirección Xeral de Urbanismo a realización de actuacións de mellora de contornas urbanas, de accesibilidade e supresión de barreiras arquitectónicas e de equipamentos públicos que teñan por finalidade a revitalización do territorio e o reequilibrio territorial, de conformidade ao apartado k) do artigo 13.1 do Decreto 142/2024, do 20 de maio, polo que se establece a estrutura orgánica da consellería (DOG núm. 101, do 27 de maio) e do Decreto 42/2024, do 14 de abril, polo que se establece a estrutura orgánica da Xunta de Galicia (DOG núm. 73 do 14 de abril).

Esta dirección xeral conta con programas dirixidos á dotación de equipamentos públicos e de mellora de contornas urbanas.

Os procesos de urbanización adecuados ofrecen a posibilidade de novas formas de inclusión social, propiciando contornas máis equitativas nos que se facilita o acceso a servizos e a novas oportunidades, promovendo a participación e a mobilización dos seus cidadáns, e reflectindo a diversidade cultural e social das cidades.

As intervencións nas áreas definidas como contornas urbanas recollen unha serie de actuacións enfocadas a mellorar o espazo público, tendo en conta as necesidades de utilización e a mellora da contorna, o ambiente e a calidade de vida:

- Incrementando a oferta de infraestruturas e equipamentos óptimos para o desenvolvemento de actividades e eventos de carácter cultural que permitan garantir o acceso á cultura á totalidade da poboación.
- Recuperando o espazo público peonil para facilitar os desprazamentos e potenciar a súa función como espazo de encontro dos veciños.
- Mantendo e conservando as rúas en óptimas condicións de seguridade para os vehículos e os transeúntes.



- Incrementando a oferta dos espazos de convivencia, con especial atención a aqueles que revistan un especial interese histórico, artístico ou arquitectónico.

En definitiva, actuacións orientadas a frear o despoboamento, potenciando as infraestruturas, servizos e equipamentos, mellorando o benestar e a calidade de vida dos seus habitantes.

O proxecto presentado forma parte da estratexia municipal para consolidar Silleda como unha vila moderna, cohesionada e sostible, garantindo un urbanismo integrador e de calidade para a veciñanza e visitantes.

En consecuencia co anterior, as actuacións propostas polo concello, pola súa finalidade, forman parte dunha das principais liñas de acción da Consellería de Vivenda e Planificación de Infraestruturas.

VIII. O Concello de Silleda ten atribuídas, a teor do artigo 25.2.d) da Lei 7/1985, do 2 de abril, reguladora das bases de réxime local (LBRL), competencias en materia de ordenación, xestión, execución e disciplina urbanística; promoción e xestión de vivendas; parques e xardíns, pavimentación de vías públicas urbanas e conservación de camiños e vías rurais.

IX. A Xunta de Galicia considera axeitado colaborar no financiamento deste proxecto de Mellora da Mobilidade Peonil na Avenida do Parque para iso contribuirá cunha achega económica máxima de cento catro mil cincocentos noventa e sete euros con vinte e dous céntimos (104.597,22 €), que representan o 14 % do investimento total do seu orzamento estimado, que ascende a setecentos corenta e sete mil cento vinte e dous euros con noventa e oito céntimos (747.122,98 €), IVE engadido.

A dita achega, ten que realizarse a través do Concello de Silleda, xa que esta institución é a mais axeitada para o cumprimento dos obxectivos previstos. Por outra banda, nos orzamentos xerais da Comunidade Autónoma existe crédito adecuado e suficiente para o financiamento da actuación.

Polo exposto, a Consellería de Vivenda e Planificación de Infraestruturas no exercicio das súas competencias, e o Concello de Silleda, no exercicio das que lle atribúe a súa lexislación específica,

manifestan a súa vontade de formalizar unha colaboración a través dun convenio que se estrutura nas seguintes

CLÁUSULAS

PRIMEIRA.- OBXECTO

O presente convenio ten por obxecto establecer as bases da colaboración e cooperación técnica e económica entre a Xunta de Galicia e o Concello de Silleda para a execución do proxecto de Mellora da Mobilidade Peonil na Avenida do Parque.

SEGUNDA.- COMPROMISOS DA XUNTA DE GALICIA

1. A Xunta de Galicia asume os seguintes compromisos:

- A través da Consellería de Vivenda e Planificación de Infraestruturas:

Contribuír ao financiamento das actuacións descritas na cláusula primeira, cunha achega económica máxima de cento catro mil cincocentos noventa e sete euros con vinte e dous céntimos (104.597,22 €), que representan o 14 % do investimento total, con cargo a aplicación orzamentaria 11.03.521A.762.0, código de proxecto 2015 00235, dos orzamentos xerais da Comunidade Autónoma.

O importe total do proxecto ascende a setecentos corenta e sete mil cento vinte e dous euros con noventa e oito céntimos (747.122,98 €), IVE engadido, dos que a Deputación de Pontevedra financiará, a través do Plan Provincia Extraordinaria-Plan Extra a contía máxima de cincocentos noventa e sete mil seiscientos noventa e oito euros con trinta e oito céntimos (597.698,38 €) equivalentes ao 80% do total e o Concello participará cunha achega de corenta e catro mil oitocentos vinte e sete euros con trinta e sete céntimos (44.827,38 €), que representan o 6 % do investimento total.

O investimento distribúese nas seguintes anualidades:

Anualidade	Importe axuda
2025	34.865,74€
2026	69.731,48€
Total	104.597,22 €

Esta axuda, de acordo co disposto no artigo 40.1º, letra d) do Decreto 11/2009, declárase compatible, no seu caso, con outras achegas, axudas ou subvencións que a entidade beneficiaria destine á execución das actuacións que se describen na cláusula primeira. Non obstante, a suma total de todas elas non poderá superar o 100% do orzamento total que require a actuación. Neste caso, a axuda establecida neste convenio reducirase ata acadar o cumprimento establecido anteriormente.

2. A Consellería de Vivenda e Planificación de Infraestruturas asumirá, ata o límite establecido no apartado 1 desta cláusula, o custo da execución das obras, unha vez que polo concello se presenten as correspondentes certificacións de execución dos traballos. Os aboamentos parciais que se efectúen, non superarán o 80% da porcentaxe subvencionable, nin excederán da anualidade correspondente ao exercicio orzamentario.

3. A Consellería de Vivenda e Planificación de Infraestruturas resérvase o dereito de inspeccionar a execución dos traballos en calquera momento, durante a súa execución.

4. Para os efectos do previsto no artigo 27 da Lei 9/2007, do 13 de xuño, de subvencións de Galicia, autorízase ao Concello de Silleda, beneficiario da subvención, para que subcontrate ata o 100% das obras obxecto de subvención. Tal autorización considérase concedida sen prexuízo, se é o caso, do cumprimento das previsións que establecen os números 3º e seguintes do devandito artigo 27.

TERCEIRA.- COMPROMISOS DO CONCELLO

O Concello de Silleda asume as seguintes obrigas:

1. Prestarlle aprobación ao proxecto básico e de execución das obras de Mellora da mobilidade peonil na Avenida do Parque, con remisión do acordo de aprobación polo órgano municipal competente á Dirección xeral de Urbanismo con carácter previo ao inicio das mesmas.

2. Realizar as xestións pertinentes para a obtención dos permisos, licencias e autorizacións regulamentarias, segundo a normativa vixente que sexa aplicable, asumindo os custos que se xeren por estes conceptos, entre os que non haberá liquidación algunha de tributo municipal á que puidera dar lugar a execución das obras, ao ser o concello o promotor e beneficiario destas actuacións.

3. O concello deberá dar publicidade das obras mediante un cartel anunciador no que conste expresamente o financiamento da Xunta de Galicia (Consellería de Vivenda e Planificación de Infraestruturas) de acordo coa imaxe corporativa oficial da Xunta de Galicia



4. Levar a cabo a contratación, execución, dirección, control e recepción das obras descritas na documentación técnica, así como asumir as obrigas económicas que excedan do importe consignado no apartado 1 da cláusula segunda.

5. Comunicarlle á Dirección Xeral de Urbanismo a data de recepción das obras para o efecto de que se envíe un representante, que estará presente para os efectos do previsto no artigo 30.2 da Lei 9/2007, do 13 de xuño, de subvencións de Galicia.

6. Presentar obrigatoriamente por medios electrónicos na sede electrónica da Xunta de Galicia, <https://sede.xunta.gal>, a correspondente rendición dunha conta xustificativa integrada pola documentación que se indica de seguido e que incorporará, en todo caso, a certificación da intervención ou do órgano que teña atribuídas as facultades de control da toma de razón en

contabilidade e do cumprimento da finalidade para a cal foi concedida a subvención, segundo o disposto no artigo 8 do Decreto 193/2011, de 6 de outubro, polo que se regulan especialidades nas subvencións ás entidades locais galegas:

(i) Copia compulsada dos xustificantes de gasto, certificacións ou calquera outro documento con validez xurídica que permita acreditar o cumprimento da finalidade da subvención. A estes efectos, indica o artigo 3 do citado decreto, que con carácter xeral, considerárase gasto realizado cando se teña contabilizado o recoñecemento da obriga polo órgano competente do concello. Así mesmo, a entidade local beneficiaria deberá acreditar, dentro do prazo dun (1) mes contado a partir da data de recepción dos fondos da axuda, ante a Dirección Xeral de Urbanismo o pagamento dos fondos ao/s contratista/s que executaron as obras obxecto do presente acordo.

(ii) Certificación ou acto de aprobación/conformidade do órgano municipal competente; e declaración, de ser o caso, sobre a obtención doutras subvencións, axudas, ingresos ou recursos que financien as actividades subvencionadas.

Así mesmo, deberá achegarse polo Concello:

Declaración responsable de atoparse ao corrente no cumprimento das obrigas tributarias e fronte a Seguridade Social e de non ter pendente de pago algunha outra débeda coa Administración pública da Comunidade Autónoma, así como unha declaración responsable de non estar incurso en ningunha das prohibicións para obter a condición de beneficiario, establecidas no artigo 10 da Lei 9/2007, do 13 de xuño, de subvencións de Galicia, de conformidade co disposto nos artigos 11 e 13 do regulamento da dita lei, aprobado polo Decreto 11/2009, do 8 de xaneiro.

- Reportaxe fotográfica na que se constate a execución das obras obxecto de convenio, así como a colocación do cartel de obra ao que se fai referencia no apartado 4.

- Indicación do número de conta para o ingreso dos fondos e xuntar unha declaración responsable da veracidade dos datos relativos á dita conta.

A data límite de presentación da referida documentación de xustificación do gasto establécese no día 10 de decembro de cada unha das anualidades de convenio.

Para a presentación electrónica poderá empregarse calquera dos mecanismos de identificación e sinatura admitidos pola sede electrónica da Xunta de Galicia, incluído o sistema de usuario e clave Chave365 (<https://sede.xunta.gal/chave365>). Estes formularios só terán validez se están debidamente asinados polo representante legal da entidade correspondente ou persoa debidamente acreditada.

7. Facilitar, se fose o caso, toda a documentación que requira a Intervención xeral da Comunidade Autónoma, o Tribunal de Contas e o Consello de Contas de Galicia, no exercicio das súas funcións de fiscalización e control do destino das axudas obxecto do presente acordo.


8. Presentar unha declaración responsable de que non concorren, no que lle atinxe, as circunstancias previstas no artigo 10 da Lei 9/2007, do 13 de xuño, de subvencións de Galicia, que imposibilitan para obter a condición de beneficiario dunha subvención pública.

9. Comunicarlle a Dirección Xeral de Urbanismo, se fose o caso, as alteracións nas condicións tidas en conta para a concesión da axuda obxecto do presente acordo e, en todo caso, a obtención concorrente de subvencións ou axudas outorgadas por outras administracións, entes públicos ou privados, nacionais ou internacionais aos efectos de propoñer, se procedera, á modificación das condicións establecidas neste convenio.

10. Reintegrarlle á Comunidade Autónoma, de acordo co artigo 33 da Lei 9/2007, a cantidade total ou parcial da axuda establecida neste convenio, e os xuros de demora que no seu caso correspondan dende o momento do seu pagamento, para o caso de incumprimento das condicións nel establecidas.

11. Asumir, pola súa consideración de beneficiario segundo o artigo 11 da Lei 9/2007, todas as obrigas que, para o mesmo, establece o citado artigo.

12. A concesión de axudas deste convenio queda supeditada ao cumprimento da normativa vixente. De acordo co disposto no artigo 17.3 da Lei 9/2007 e no artigo 40.1º, letra d) do Decreto 11/2009, polo que se aproba o seu regulamento, a achega económica será compatible con outras subvencións, ingresos ou recursos para a mesma finalidade, procedentes de calquera Administración ou entes



públicos ou privados, nacionais, da Unión Europea ou e organismos internacionais.

13. O Concello de Silleda presta expresamente o seu consentimento para que se lle dea ao presente convenio a publicidade que establecen os apartados 1 e 2 do artigo 15 da Lei 1/2016, do 18 de xaneiro, de transparencia e bo goberno, na forma establecida, e nos rexistros públicos regulados no Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 21 de decembro, de orzamentos xerais da Comunidade Autónoma de Galicia para o ano 2006 (DOG núm. 153 do 9 de agosto). Polo tanto, o convenio será obxecto de publicación na páxina web oficial con expresión da contía e a súa finalidade, de acordo co disposto na citada normativa.

14. Nomear, se fose o caso, de entre os seus funcionarios, a un grupo de traballo que dedicará unha especial atención ó desenvolvemento e seguimento das actuacións establecidas neste convenio e mailo seguimento dos prazos estipulados no correspondente contrato de execución.

CUARTA.- PROCEDEMENTO DE XESTIÓN

1. A Consellería de Vivenda e Planificación de Infraestruturas, a través da Dirección Xeral de Urbanismo, financiará as actuacións ata un máximo de cento catro mil cincocentos noventa e sete euros con vinte e dous céntimos (104.597,22 €), que representan o 14 % do investimento total e que fará efectivos mediante transferencia bancaria ao Concello de Silleda, contra a presentación por este das certificacións de obra executada. Non obstante, poderán efectuarse aboamentos parciais sen que os mesmos superen o 80% da porcentaxe subvencionada, logo da presentación das correspondentes xustificacións e o cumprimento dos requisitos definidos nos puntos (i) e (ii) do apartado 6 da cláusula terceira.

2. Unha vez rematados os traballos obxecto do acordo, por parte do concello deberá ser xustificado o cumprimento das condicións da execución e a consecución dos obxectivos previstos, na forma establecida nos artigos 28 e 29 da Lei 9/2007. A referida xustificación consistirá, entre outras, na certificación da intervención, ou do órgano que teña atribuídas as facultades de control, acreditando o cumprimento da finalidade para que foi outorgada.

Así mesmo, deberá presentarse un certificado expedido pola secretaría da entidade local, co visto e prace do/a alcalde/sa relativo a aprobación polo órgano competente da conta xustificativa da subvención, segundo o previsto no artigo 10 do Decreto 193/2011, de 6 de outubro, polo que se regulan especialidades nas subvencións ás entidades locais galegas.

De conformidade co disposto no apartado 6 do artigo 28 da Lei 9/2007, se a actividade se financiara ademais de coa presente subvención con fondos propios, ou outras subvencións ou recursos, deberá acreditarse na xustificación o importe, procedencia e aplicación de tales fondos ás actividades subvencionadas. O incumprimento desta xustificación, ou a súa insuficiencia, implicará o reintegro desta axuda, nos termos fixados no artigo 33 da Lei 9/2007.

Con anterioridade a facerse efectivo o pagamento tal como establece o artigo 60.4 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia o órgano outorgante realizará a verificación previa de que o beneficiario está ao corrente no cumprimento das obrigas tributarias ou fronte á Seguridade Social e de non ter pendente de pago algunha outra débeda coa Administración pública da comunidade autónoma nos termos previstos nos artigos 10 e 11 do citado Decreto 11/2009.

3. Unha vez revisada e validada a documentación xustificativa a Dirección xeral de Urbanismo aboará súa achega económica na conta bancaria indicada polo concello na solicitude de pagamento.

En todo caso, a cantidade máxima que se obriga a achegar, de acordo co establecido na cláusula segunda, reducirase na mesma proporción que represente a cantidade xustificada respecto do orzamento estimado establecido no anexo I.

A Consellería de Vivenda e Planificación de Infraestruturas limitará, en todo caso, a súa achega económica aos límites pactados no presente convenio, polo que non asumirá os aumentos que se puideran producir.

QUINTA.- RELACIÓN LABORAL ENTRE AS PARTES

A subscripción do presente convenio non implica relación laboral, contractual ou de calquera tipo, entre os profesionais que desenvolvan as actividades e a Consellería de Vivenda e Planificación de Infraestruturas, de tal xeito que non se lle poderá esixir responsabilidade ningunha, nin directa, nin subsidiaria, polos actos ou feitos ocorridos no desenvolvemento deste. En consecuencia, o concello asumirá a posición de empresario ou contratante verbo de tales profesionais, e asumirá en exclusiva as obrigas e responsabilidades legais que a normativa legal e convencional lle impón verbo destes.

SEXTA.- COMISIÓN DE SEGUIMIENTO

Para o seguimento, control e avaliación de cantas dúbidas poidan xurdir na aplicación do convenio poderase constituír unha comisión de seguimento, composta por:

- Unha persoa representante da Dirección Xeral de Urbanismo
- Unha persoa representante do Concello de Silleda

Esta comisión asumirá, sen prexuízo das competencias que correspondan a cada parte, as seguintes funcións:

- Velar polo cumprimento dos fins previstos no presente convenio.
- Realizar un seguimento das actuacións e/ou actividades incluídas no presente convenio.
- Estudar e propoñer, de ser o caso, calquera medida que, en relación cos fins do presente convenio, redunde en beneficio dos obxectivos perseguidos co mesmo.
- Resolver as dúbidas e controversias que se xeren na interpretación e/ou aplicación do convenio.

Os membros da Comisión de Seguimento, ou persoas en quen deleguen, reuniranse cunha periodicidade cando menos semestral, adoptándose os acordos que procedan por maioría dos membros.

Ás reunións da dita comisión poderanse incorporar, por acordo das partes, aquelas persoas técnicas ou representantes das Administracións ou entidades intervinientes, así como se é o caso, representantes doutros organismos ou entidades cuxa presenza se considere conveniente para o



cumprimento dos compromisos asumidos en virtude deste convenio.

A presidencia da Comisión de seguimento corresponderalle á persoa representante da Dirección xeral de Urbanismo.

A este respecto, para a súa válida constitución deberán estar presentes os representantes de todas as partes intervinientes no convenio.

En todo o non previsto expresamente neste convenio para a Comisión de Seguimento, seralle aplicable o réxime dos órganos colexiados regulado na sección 3ª do capítulo II do título preliminar da Lei 40/2015, do 1 de outubro, de réxime xurídico do sector público ou lexislación que en diante o substitúa.

SÉTIMA.- OBRIGAS TRIBUTARIAS E DE ORDE SOCIAL

En aplicación do establecido no artigo 11 f) do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, a entidade local aportará, con carácter previo á sinatura do presente acordo e tamén, xunto coa documentación xustificativa que dea lugar aos pagamentos previstos na cláusula segunda, a oportuna declaración responsable de estar ao día no cumprimento das obrigas tributarias e fronte á Seguridade Social e de non ter pendente de pagamento ningunha outra débeda coa Administración Pública da Comunidade Autónoma.

Así mesmo, en virtude do disposto no artigo 4 do Decreto 193/2011 do 6 de outubro, polo que se regulan especialidades nas subvencións ás entidades locais galegas, será requisito para a concesión de subvencións que as entidades locais cumprisen o deber de remisión ao Consello de Contas das contas xerais de cada exercicio.

OITAVA.- PUBLICIDADE

A sinatura do presente convenio suporá o consentimento expreso das partes asinantes para incluír e facer públicos os datos persoais que consten no convenio, e mailo resto de especificacións

contidas no mesmo, de conformidade co artigo 15 da Lei 1/2016, do 18 de xaneiro, de transparencia e bo goberno (DOG núm. 30 do 15 de febreiro) e o Decreto 126/2006, do 20 de xullo, polo que se regula o rexistro de convenios da Xunta de Galicia (DOG núm. 149 do 3 de agosto).



NOVENA.- PROTECCIÓN DE DATOS DE CARÁCTER PERSOAL

As partes asinantes obríganse ao cumprimento do Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos), da Lei Orgánica 3/2018, de 5 de decembro, de protección de datos persoais e garantía dos dereitos dixitais, e demais normativa vixente de aplicación en cada momento en materia de protección de datos.

DÉCIMA.- RESOLUCIÓN

Serán causas de resolución deste acordo as seguintes:

- 
- O transcurso do prazo de vixencia do acordo.
 - O acordo unánime de todos os asinantes.
 - O incumprimento das obrigas e compromisos asumidos por parte dalgúns dos asinantes.

Neste caso, calquera das partes poderá notificar á parte incumpridora un requirimento para que se cumpra nun determinado prazo coas obrigas ou compromisos que se consideren incumpridos. Este requirimento será comunicado ao responsable do mecanismo de seguimento, vixilancia e control da execución determinado na cláusula sexta, e ás demais partes asinantes.

Se transcorrido o prazo indicado no requirimento persiste o incumprimento, a parte que o dirixiu notificará ás partes asinantes a concorrencia da causa de resolución, e entenderase resolto o

convenio. A extinción do convenio por esta causa, poderá implicar o pago dunha indemnización polos prexuízos causados derivados de actuacións xa executadas ou como consecuencia doutras actuacións que teñan que asumir debido ao referido incumprimento.

- Por decisión xudicial declaratoria da nulidade do acordo.

- A imposibilidade sobrevida de cumprimento do obxecto do acordo.

Non obstante, se cando concorre calquera destas causas de resolución existen actuacións en curso de execución, as partes, a proposta da comisión de seguimento, vixilancia e control deste acordo, poderán acordar a continuación e finalización das actuacións en curso que consideren oportunas, establecendo un prazo improrrogable para a súa finalización, transcorrido o cal deberá realizarse a liquidación das mesmas.

DÉCIMO PRIMEIRA.- MODIFICACIÓNS

As modificacións formalizaranse mediante *addenda* cos mesmos requisitos e condicións para a aprobación do acordo, agás aquelas modificacións de carácter técnico aprobadas polo órgano de contratación de acordo coa normativa de contratos administrativos que non impliquen a superación do importe máximo reflectido na cláusula segunda do convenio nin o incremento do número de anualidades orzamentarias.

DÉCIMO SEGUNDA.- VIXENCIA DO CONVENIO

O presente convenio producirá efectos a partir da data da súa sinatura e estará vixente durante un período de dous anos, sen prexuízo de que ambas as partes acorden unánimemente unha prórroga por un período máximo dun ano adicional en calquera momento antes da finalización do prazo de vixencia, en cumprimento das previsións recollidas no artigo 49. h) da Lei 40/2015.

DÉCIMO CUARTA.- NATUREZA, LEXISLACIÓN APLICABLE, INTERPRETACIÓN E INCUMPRIMENTO

1. Este convenio de colaboración ten natureza administrativa, correspondéndolle en último término

a resolución das cuestións que poidan xurdir sobre a súa interpretación, execución e cumprimento á Consellería de Vivenda e Planificación de Infraestruturas. A xurisdición competente para resolver as cuestión litixiosas que poidan xurdir é a contencioso-administrativa.

2. Para o non previsto no presente convenio, resultará de aplicación a Lei 9/2007, do 13 de xuño, de subvencións de Galicia e o seu Regulamento, aprobado polo Decreto 11/2009, do 8 de xuño, e o Decreto 193/2011, de 6 de outubro, polo que se regulan especialidades nas subvencións ás entidades locais galegas.

3. O incumprimento de calquera das cláusulas do presente convenio constituirá causa suficiente de resolución do mesmo.

Este convenio obriga ao cumprimento do expresamente pactado, someténdose ambas as partes ao acordado en todas as estipulacións.

E para que así conste, de conformidade con canto antecede, no exercicio das atribucións de que son titulares os asinantes, e obrigando con iso ás Administracións que representan, asinan o presente convenio na data sinalada.


A conselleira de Vivenda e Planificación
de Infraestruturas

María Martínez Allegue



A alcaldesa-presidenta do Concello
de Silleda

Paula Fernández Pena

A large, stylized handwritten signature in blue ink, corresponding to Paula Fernández Pena.

ANEXO I
RESUMO DO ORZAMENTO
PRESUPUESTO DE EJECUCIÓN MATERIAL:

<u>Código</u>	<u>Título</u>	<u>Presupuesto</u>
1	DEMOLICIONES	10.673,08
2	URBANIZACIÓN Y PAVIMENTOS	301.648,87
3	SEÑALIZACIÓN	3.980,37
3.1	SEÑALIZACIÓN HORIZONTAL	128,38
3.2	SEÑALIZACIÓN VERTICAL	3851,99
4	IMPLANTACIÓN DE LA OBRA	2.304,78
5	JARDINERÍA Y MOBILIARIO URBANO	32.226,26
5.1	ACTUACIONES PREVIAS	2.209,43
5.2	RED DE RIEGO	4.854,34
5.3	SIEMBRAS Y PLANTACIONES	18.454,56
5.4	MOBILIARIO URBANO	6.707,93
6	OBRAS COMPLEMENTARIAS	40.141,95
6.1	PÉRGOLA EN MADERA TRATADA	7.538,07
6.2	PELDAÑO DE CANTERÍA DE PIEDRA DE GRANITO	20.664,23
6.3	MURETE DE HORMIGÓN "IN SITU"	11.939,65
7	REPOSICIÓN DE SERVICIOS	114.533,28
7.1	ALUMBRADO PÚBLICO	74.159,93
7.2	LÍNEAS ELÉCTRICAS BAJA TENSIÓN	18.370,00
7.3	TELECOMUNICACIONES	22.003,26
8	PLAN DE CONTROL DE CALIDAD	3.106,00
9	GESTIÓN DE RESIDUOS	6.589,30
10	SEGURIDAD Y SALUD	1.667,54
TOTAL PRESUPUESTO EJECUCION MATERIAL		518.871,43

PRESUPUESTO BASE DE LICITACIÓN:

TOTAL PRESUPUESTO EJECUCION MATERIAL	518.871,43
13,00% GASTOS GENERALES	67.453,29
6,00% BENEFICIO INDUSTRIAL	31.132,29
VALOR ESTIMADO DEL CONTRATO	617.457,01
21,00% IVA	129.665,97
TOTAL PRESUPUESTO BASE DE LICITACIÓN	747.122,98

